

REGIONAL NEWS BULLETIN

HEADLINES (MORNING)

- 1. Mizoram Legislative Assembly budget session chu vawiin chawhma dar 10 ah hian tan a ni dawn.
- 2. ZPM Legislature Party nimina Chief Minister Pu Lalduhoma kaihhruaia thukhawm chuan sawhthing chingtuten an thar ang ang te a bo a bang awm lovin an hralh vek ang an ti.
- 3. India leh Qatar chuan an inkara thawhdunna awm mek chu tilianin Strategic Partnership-a hlankai an remti.
- 4. Delhi Chief Minister thar ngaihtuah turin vawiinah BJP Legislature Party inhmuhkhawm New Delhi-ah neih a ni dawn

<><><>

ASSEMBLY

Mizoram Legislative Assembly budget session chu vawiin chawhma dar 10 ah hian tan a ni dawn a, Assembly Secretariat atanga thudawn danin hian Higher & Technical Education Department atanga theh luh Mizoram state University Bill bakah sawrkar dan siam tura duan thar LESDE atangin The Mizoram Private Placement Agencies (Regulation) Bill, 2025 leh UD&PA atangin The Mizoram Urban & Regional Development Bill, 2025 te thehluh a ni tawh a, He'ng bill pathum bakah hian Finance department atangin dan siamthat tur The Mizoram Goods & Service Tax (First Amendment) Bill, 2025 chu thehluh a ni tawh bawk.

Official Resolution pakhat lut tawhin, heihi environment, forests & climate change minister Pu Lalthansanga'n assembly pawmpui tura a putluh tur a nih thu dawn a ni a. Hei hi Parliament-in dan a lo pawm tawh “The Water (Prevention & Control of Pollution) Act” Mizoram assembly in a lo pawmpui (ratify) vena tur ni a thu dawn a ni. Mimal thehluh (private resolution) 85 a lut tawh a. Zirtawpni hi Private member-te puala hun hman thin a nih lai-in tun assembly session-ah hian Zirtawpni vawi khat February ni 21 bak chu Zirtawpni apiang chawlh a nih dawn avangin hun a awm dawn lova. February ni 21-ah pawh hian Prime Minister hlui Dr. Manmohan Singh sunna hun bakah larsap thusawi lawmthu sawina motion sawiho ni tur a nih dawn avangin hun a tlem hle dawn a ni.

Zawhna hi House chhunga chhan chi (starred question) 817 leh ziaka chhan chi (unstarred question) 96 a lut tawh a. House dawhkana dah tur lehkhaw pawimawh 5 a lut tawh bawk.

(Voicecast : C. Lalmunsangi)

Mizoram assembly inkhawmah hian March ni 4 khian finance changtu chief minister Pu Lalduhoma chuan tangka kum thar (2025-2026) atana Mizoram sum hman tur ruahman (annual budget) chu a pharh ang a. Hei hi budget a vawi 2 pharhna tur a ni a, tun tangka kum kallai hi sum harsatna avangin insawhngheh kum (year of consolidation)-ah ZPM sorkar chuan a puang a. Hmalakna lian tham kalpui an tum lo sa a. Kumin budget-ah hian ZPM-in inthlan hma a an lo intiam angte tihpuitlin theihna tur budget danglam hmuh beisei a ni.

(DESK)

<><><>

CHAPCHAR KUT

Art & Culture Minister Pu C. Lalsawivunga’n kumin Chapchar Kut hmang turin zo hnahtlak hmun hrang hranga awm a sawm a, Chapchar Kut chu Aizawl bakah District zawng zawng leh rampawna Mizoram house ah hman a ni dawn tih a sawi.

Pu C. Lalsawivunga chuan Art & Culture Department bultumin Chapchar Kut chu hmun hrang hrangah pui thei ang berin hman a ni dawn a ti a, Chapchar Kut thupui Hawihhawmna chu Mizo hnam ziarang ropui tak, khawtlang nun leh inlaichinna ah bet tlat a ni a, he kut hmang hian he ze ropui tak hi chawi sana a awm theih nan mi zawng zawng tel turin a sawm a ni.

January ni 16-a Chief Minister Pu Lalduhoma kaihhruaia Chapchar Kut organising committee thukhawm chuan kumin Chapchar Kut thupui atan "Zo nun ze mawi - Hawihhawmna" tih chu an thlang a, Chapchar Kut hmanna pui ber chu Aizawl lammualah March ni 6 leh ni 7 ah neih tura duan a ni.

March ni 3 ah hian Chapchar Kut pual Tlan (Kut Run) buatsaih a ni dawn a, ni 4 ah Flower Show leh Painting & Exhibition Show kalpui tan tura ruahman niin March ni 5 ah Chapchar Kut heritage tour buat a ni ang a, he mi ni vek hian Falkawn Zokhuaah Mizo Pi leh pute Nun tarlanna hun buatsaih tan a ni dawn a. A tuk ni 6-ah pawh neih chhunzawm tur niin Ni 5 ah vek hian Kut pual Handloom, Textile & Handicraft Exhibition and Food Processing & Food Court hawn a ni ang a, exhibition & food court hian ni 7 thleng a awh dawn a ni.

<><><>

ZPM

ZPM Legislature Party nimina Chief Minister Pu Lalduhoma kaihhruaia thukhawm chuan sawhthing chingtuten an thar ang ang te a bo a bang awm lovin an hralh vek ang an ti a.
Pu Lalduhoma chuan kuthnathawktuten sawhthing an hralhna tur ruahmanna fel tak siam a nih tawh thu a tar lang a, Secondary collection centre 62 atanga sawhthing hralh tur a nih thu sawiin, a ruala chawh vek a rem loh chang a awm a nih pawhin, mipuiten ruahmantute thu lo ngaichang thiam tura a duh thu a sawi bawk.

Hmunphiah hralh mek a nih thu sawi lang bawkin, Chief minister chuan, Empanelled buyer ten Hmunphiah Grade ‘A’ duh khawp lei tur an hmuh loh Chhan en zui mek a ni a, Hmunphiah hralh thei lo an awm a nih chuan sawrkarin march thla chhungin a lei sak vek ang a ti bawk.

<><><>

MARATHON

Sports & Youth Services Department leh Innovations India Pvt. Ltd. chuan Directorate of Sports & Youth Services, MINECO ah Aizawl International Half Marathon buatsaih a nih thei nan thawhhona thuthlung (MoU) nimin khan an ziak a. MoU ziahna hi Sports Minister Pu Lalnghinglova Hmar in a telpui a, Sports & Youth Services Department aiawhin Secretary, Sports & Youth Services Pu Lalramsanga Sailo leh Innovations India Pvt. Ltd. aiawhin Capt. Rahul Bali ten MoU ah hming an ziak a ni.

Pu Lalnghinglova Hmar chuan Half Marathon intlansiak hi khawvelin a buaipui nasa a, a lar chhoh mek a, India Marathon Map-ah Mizoram a lan a hun ve tawh hle a ni, a ti a. Infiamna tihhmasawn zel kawngah te, hriselna leh tawksa insawizawi fitness tih lar leh uar zel nan te, khualzin hip belh nan te leh ruihlo dona kawngah te Mizoram tan a tangkai theih thu a tarlang a. Khawvel leh ram pum huap marathon tlan thin runner tha an rawn tel thei nan he Half Marathon hi Athletics Federation of India (AFI) hriatpuina leh an Calendar ah telh anih thei nan hma lak tum a nih thu te a sawi lang bawk a ni.

Aizawl International Half Marathon buatsaih nana sum tul chu Innovations India in sponsorship kal tlangin an dap dawn a, sum tlema zawng chu Sports & Youth Services Department in a tum bawk dawn a. Half Marathon intlansiak hi kilometre 21.1 thui tur a ni a, an tlan na kawng pawh la thlan tur a ni. Half Marathon bakah km 5, km 10 tlan te pawh bilh telh tum a ni. A tel tum te (naupang tan bak) chu man chawia inziahlul a ngai dawn a ni.

<><><>

DIG (NR) VISIT KOLASIB

Mizoram sorkar Home Department hnuaia Dy Inspector General of Police (Northern Range) Pu C. Lalthanmawia chuan niminn khan Kolasib District chhunga Police hmun pawimawh hrang hrangte a tlawh.

Pu C. Lalthanmawia chuan Bairabi Police Station, Bairabi Zophaia ILP pek chhuahna (ILP Issue counter) te, Phaisena Border Outpost, Kolasib Police Station leh Kolasib SP office te a tlawh a. DIG hian Police te chu fuih in, Mizoram leh a chhungte chengte him tlan theihna turin Police te chuan mawhphurhna sang tak an nei tih hre thar tur leh an eizawinna Police hna chu hna zahawm tak anih avangin rilru leh taksa hrisel an neih theih nan mahni inthununna ngai pawimawh a, zuk leh hmuam leh Ruihhlo lakah fihlim theuh turin a chah.

DIG (NR) hian Kolasib SP office tlawh in, SP Pu David H. Lalthaglana leh a thawhpuiten an lo dawngsawng a, Kolasib Police te kawm in, Mizoram sorkarin Police indaihlohna a hriat thu a sawi a, sum awmdan a zir in Police lak belh mek anih thu a sawi a, wawi leh khatah lak belh teuh theih anih loh avangin sorkar hmalakna ngaihchan tha a tih thu a sawi.

DIG Pu C. Lalthanmawia chuan MJA te kawm in, hmun hrang hrangah Police te leh Media miten thawhhona tha tak an neih avangin lawmthu a sawi a, Dan leh thupek ken kawh kawngah theihtawp an chhuah thu a tarlang a. Kolasib District chu State dang nena inkalpawhna pawimawh tak anih avangin sorkar in a ngaih pawimawh thu leh thawktu indaihlohna sawi awm thin chu a theih ang anga dah belh anih theih nan hmalak mek anih thu a sawi.

DIG hian Kawnpui Police Station leh Mualvuma Ist IR Police Bn Hqrs te a tlawh bawk aa. DIG (NR) hian Aizawl, Kolasib leh Mamit District te a huam ani.

(Andrew Kolasib PTC)

NITI AAYOG ADP RANKING

Ramchhunga District hnufual chawikanna tura duan NITI Aayog Aspirational District Program ah Mizorama Mamit District chu Financial Inclusion leh Skill Development huanga ti tha bera thlan a ni.

National Institution for Transforming India (NITI Aayog) hian Aspirational District Program hnuaia ramchhunga District ti tha 36 an tarlang a, Mizoram atangin Mamit District chu Mitin huap sum leh pai lama hmasawwna – Financial Inclusion leh Eizawng tura thiamna – Skill Development lama hmasawwna kawngah ti tha ber a ni a, hemi lawmman atan hian cheng vbch 3 a keng tel dawn a ni.

NITI Aayog in ramchhunga state 16-a District ti tha a puan zingah hian hmarchhak atangin Mizoram chu a lang awmchun a ni a, Aspirational District Program hnuaiah hian intihsiakna hrang hrang awmin hriselna dinhmun, lo neia eizawwna, mipui hmasawwna leh zirlan lama hmasawwna bakah Mamit District in lawmman a dawwna mitin huap sum leh pai lama hmasawwna leh eizawng tura thiamna te a tel a, heng bakah hian intihsiakna hrang hrang a awm bawk.

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

PRIME MINISTER & AMIR OF QATAR

India leh Qatar chuan an inkara thawhdunna awm mek chu tilianin Strategic Partnership-a hlankai an remti. Nimin khan New Delhi-ah ram aiawh pahnih inbiaknaah he inremna hi ziah a ni a. He hunah hian Prime Minister Narendra Modia leh Amir of Qatar, Sheikh Tamim Bin Hamad Al-Thani te pawh an tel a ni.

External Affairs Minsitry-a Secretary of Consular,Passport,Visa and Overseas Indian Affairs, Arun Kumar Chatterjee chuan chanchinbumite kawmin Prime Minister Modie lah Amir of Qater te inbiaknaah hian sumdawwna, energy, sum peipunna, ngaihtuahna thar, technology, food Security, Culture leh mipui indawr tawwna lam an sawi uar a ti a. Khawvel thil thleng mek leh ram pahnih chhehvela thilthlengte an sawidun a ti bawk a. Secretary Chatterjee chuan India leh Qatar insumdawn tawwna hlut zawng chu kum nga chhungin dollar tluklehdingawn 28 a tihpun an rel a ti bawk.

Nimina ram pahnih aiawh inbiaknaah hian External Affairs Minister Dr.S.Jaishankar, Union Finance Minister Nirmala Sitharaman, Union Commerce and Industry Minister Piyush Goyal, National Security Advisor Ajit Doval leh sawrka rmi pawimawh dangte an tel a ni.

DELHI

Delhi BJP Legislature Party inhmukhawm chu vawiinah New Delhi-ah neih a ni dawn. Thudawn danin he inhmukhawmah hian Delhi Chief Minister thar tur tih fel a ni dawn a. He hunah hian BJP MLA thlan thar zawng zawng leh party hruaitute an tel dawn a. Delhi Chief Minister thar lakluh hi naktukah Ram Lila Maidan ah neih tura beisei a ni a. Delhi Assembly inthlan neih zawh takah khan BJP chuan seat 70 atangin seat 48 ah an chak a ni.

(Newsonair)